



Inatsisartuni ilaasortat Knud Kristiansen aamma Siverth K. Heilmann, Atassut
Inatsisartut
/MAANI

**§ 37 naapertorlugu nunaqarfinni tunitsiviit nioqqutissiorfiillu pillugit
Naalakkersuisunut apeqqutigineqartumut nr. 2011-148-mut akissutit**

15. aug 2011
Sagsnr. 2011-053756
Dok. Nr. 700312

Inatsisartut suleriaasianni § 37 naapertorlugu nunaqarfinni tunitsiviit
nioqqutissiorfiillu pillugit apeqquteqarputit. Apeqqutigineqartut uannut
akisassanngorlugit nassiunneqarsimapput.

Postboks 269
3900 Nuuk
Tlf. (+299) 34 50 00
Fax (+299) 32 47 04
E-mail: apnn@nanoq.gl
www.nanoq.gl

Naalakkersuisunut apeqqut 1

Ullumikkut tunitsiviit nioqqutissiorfiillu qassit nunaqarfinniippat?

Naalakkersuisunut apeqqut 2

Tunitsiviit nioqqutissiorfiillu nunaqarfinniittut qassit Namminersorlutik
Oqartussat suliffeqarfiutaannit pigineqarpat?

Naalakkersuisunut apeqqut 3

Tunitsiviit nioqqutissiorfiillu nunaqarfinniittut qassit uninngappat? Tunitsiviit
nioqqutissiorfiilluunniit uninngasut kikkunnik pigineqarpat?

Apeqqutigineqartunut 1, 2 aamma 3-mut akissut

Nalunaarutigissavara tunisassiorfiit Kalaallit Nunaanni nunaqarfinniillutik
nalunaarsorneqarsimasut 38-iummata. Taakkunannga tunisassiorfiit 13-t Royal
Greenland A/S-imit 11-llu Arctic Greenfood A/S-imit (AGF) pigineqarput.
Taakku saniatigut arlalinnik AGF-ip ataaniittunik tunisassiorfeqarpoq
suliffeqarfinniit Namminersorlutik Oqartussanit pigineqartunit
aningaasaliiffigineqarlutik pilersinneqarsimasunik. Tunisassiorfik uninngasoq
qanoq paasineqassanersoq apeqqutaavoq, kisiannili nalunaarutigisinnaavara
tunisassiorfiit 32-t 2011-mi tunitsivigineqarsimammata. Ukioq manna
tunisassiorfinnit 6-usunit tunitsivigineqarsimanngitsut marluk Royal
Greenlandimit pigineqarput, ataaseq Sisimiut Fishimit kingulliillu pingasut
Arctic Greenfood A/S-imit pigineqarlutik. Taakku saniatigut tunisassiorfiit
mikinerusut arlallit Qeqertarsuup Tunuaniittut ingerlatsivimmilu
Uummannamiittut namminersortunit pigineqarput.

Naalakkersuisunut apeqqut 4

Tunitsiviit nioqqutissiorfiillu nunaqarfinniittut qassit piginnittuminnut
iluanaarutaasumik ingerlappat?

Apeqqut 4-mut akissut

Naalakkersuisut ilimagaat tunitsiviit nioqutissiorfiillu tamarmik aningaasatigut sinneqartooruteqarnissaq anguniarlugu ingerlanneqartartut. Ilimagisariaqarpoq ingerlatseqatigiiffinnut tamanut tamanna atuuttoq, tassunga ilaalluni Royal Greenland A/S.

Tunisassiorfinnili ataasiakkaani angusarineqartut allanngorarsinnaasarput. Royal Greenland A/S suliffissuaq ataatsimut isigalugu tunisassiorfinnut ataasiakkaanut aningaasaqarnikkut periusissaq pitsaanerpaaq anguniarlugu naliliisarpoq. Tamanna tunngavigalugu Royal Greenland A/S-imit aalajangerneqartarpoq tunisassiorfiit ammannassanersut, matuneqassanersut imaluunniit ilaannakortumik ammatinneqassanersut. Massakkorpiaq aningaasarsiornerup tungaatigut isigalugu Royal Greenland A/S tallimanik tunisassiorfiuteqarpoq ukioq naallugu ammatinneqarsinnaanngitsunik.

Tamakku saniatigut Inatsisartut najukkani aalisartunut piniartunullu tunitsiveqartitsinerup ingerlatiinnarnissaa qulakkeerniarlugu tunitsiviit arlallit ammatinneqarnissaannik kissateqarput, naak tamanna aningaasaqarnerup tungaatigut isigalugu pissusissamisuunngikkaluartoq. Tamanna amerlanertigut pisarpoq sumiiffinni najukkanilu suliffeqarnerup tungaatigut allanik periarfissaqarpiannngitsuni. Taamaammat tassuuna tunisassiorfinnik taakkuninnga piginnittut taarsiiffiginialugit aningaasanut inatsimmi aningaasanik atugassanngortitsisoqarpoq. Taarsiiffigininneq piginnittuusunut pineqartunut kiffartuussinissamik isumaqatigiissuteqarnikkut piviusunngortinneqarpoq. Massakkorpiaq katillugit tunitsivinnut nioqutissiorfinnullu 16-inut tunisisarnerup ingerlaannarnissaa pillugu Royal Greenland A/S-imut aamma Arctic Greenfood A/S-imut kiffartuussinissamik isumaqatigiissuteqartoqarpoq.

Tunisassiorfinnut Namminersorlutik Oqartussanik kiffartuussinissamik isumaqatigiissuteqarnermut ilaasunut massakkut taakkununga atasumik aningaasaqarneq kukkunersiuisunit misissorneqarpoq. Misissuinissaq Aningaasaqarnermut Ataatsimiititaliamit kissaataavoq. Misissuinerup inerneru ukiup ingerlanerani piareerpata apeqqtigineqartoq Naalakkersuisunit erseqqinnerusumik akineqarumaarpoq.

Naalakkersuisunut apeqqt 5

Naalakkersuisut isumaqarsinnaanerlutik tunitsiviit nioqutissiorfiillu nunaqarfinniittut s.i. Royal Greenland A/S-imit namminersortunut aamma/imaluunniit nunaqarfimmiunut iluanaarutaasumik tunineqarsinnaagaluartut?

Apeqqt 5-imut akissut

Royal Greenland A/S-ip ilaatigut tunisassiorfiit ataatsimut isigalugit periusissat pitsaanerpaat naliliiffigisarpaat, kisiannili tamatumani aamma tunisassiorfimmii tunisassiorfimmu nalileeqqissaarnerit aallaavigalugit. Tamanna pisarpoq ilaatigut tunisassiassat pissarsiarinissaasa qulakkeerneqarneratigut, taamaaliornikkut taamatut suliaqarnermi aningaasatigut sinneqartooruteqarnissaq anguniarlugu. Piginnittuusunut ataasiakkaanut tunisassiorfimmik tunisinissaq, ingerlatiinnarnissaanut taarsiullugu, tunngaviatigut periarfissaajuaannarpoq. Tamanna ingerlatseqatigiiffimmit ingerlaavartumik naliliiffigineqartarpoq.

Tunngaviatigut apeqqutaavoq tunisassiassat amerlassusaat tunisassiassallu pissarsiarinissaat tunitsiviit nioqqutissiorfiillu qanoq amerlatigisut akilersinnaasumik ingerlannissaannut. Tamanna aamma inuussutissarsiummi tassani suliffissaqartitsiniarnermut atuuppoq. Assersuutigalugu Aalisarnej pillugu Isumalioqatigiissitap isumaliutissiisummini 2009-meersumi tikkuarpaa aalisartut ataasiakkaat aamma tunitsivinnik nioqqutissiorfinnillu piginnittuusut isertitaqarnerulernissaannut tunngavigineqartussaq pingaarnerpaaq tassaammat aqqissuussaanikkut naleqqussarnissaq. Massakkut kiffartuussinissamik isumaqatigiissutit aqputigalugit tunitsiviit piginnarnissaannut tapiissuteqartarnerup taamatut ineriartortitsinissaq kinguarsartarppaa, taamaalillunilu tunisassiorfiit tapiiffigineqartartut tunisassiorfiillu tapiiffigineqarneq ajortut akornanni unammilleqatigiinnerup akunnattoortinnissaa navianartorsiortissinnaallugu.

Taamaammat Naalakkersuisut Aningaasaqarnermut Ataatsimiititaliaq assigalugu qularnartoqartippaat tapiissutit aqputigalugit tunitsivinnik ingerlatsiinnarnissaq, annerusumillu najugaqarfinniittut tunitsivinnik nioqqutissiorfinnillu piginnittuulernissaannut ineriartortoqarnissaa takorusullugu. Taamaammat Naalakkersuisut tunisinermut tapiissutit annikilliartulernissaat eqqarsaatigaat. 2014-imiit tapiissutit aningaasanut inatsimmiit peerpaat. Taamatuttaaq Royal Greenland A/S-ip ingerlatseqatigiiffittut siunissami tunisassiorfinnik ullumikkut kiffartuussinissamik isumaqatigiissutit aqputigalugit pigineqartunut piginnittuuginnarnissaata qanoq pingaaruteqartiginera pillugu erseqqinnerusumik Naalakkersuisut ingerlatseqatigiiffimmik oqaloqateqarniarput.

Naalakkersuisunut apeqqut 6

Nunaqarfinni tunitsiviit nioqqutissiorfiillu siusinnerusukkut namminersortunut aamma/imaluunniit nunaqarfinniunut tuniniarlugit misilinneqarsimava?

Apeqqut 6-mut akissut

Nalunaarutigisinnaavara siusinnerusukkut tunitsivinnik nioqqutissiorfinnillu tunisisoqarsimammat. Assersuutigalugu Royal Greenland A/S tunisassiorfinnik marlunnik Sisimiut Fishimut tunisaqarsimavoq. KNI A/S-ip aamma tunisassiorfiit Arctic Greenfoodimut tunniussimavaat. Taamatuttaaq tunisassiorfinnik najukkani soqutigisaqartunut tunniussisoqarsimavoq. Taamaalilluni ingerlaavartumik namminersortunngorsaasoqarpoq tunisassiorfiit pisortanit pigineqartut namminersortunut nuunnerisigut. Taamaattorli tunisassiorfinni aningaasaqarneq piginnittuunermik pingaarnermik tunngaveqanngilaq. Aningaasaqarnermi sumiiffinni tunisassiassat amerlassusaat pitsaassusaallu apeqqutaapput, kisiannili aamma soorunami ingerlatseqatigiiffiup ingerlatsisoqarnermigut qanoq aqunneqarnera ingerlatseqatigiiffiillu tunisassianik qanoq tuniniaallaqqitiginera apeqqutaallutik.

Naalakkersuisunut apeqqut 7

Aappimik akisoqarpat: Tunisineq taanna qanoq angusaqarfiuva? Ingerlatsiviit tunineqartut pisortanit tapiiffigineqaratik ingerlasinnaasimappat?

Apeqqut 7-mut akissut

Ingerlatseqatigiiffiit arlaqartut aningaasaliisartunut namminersortunut tunineqartut ilaat kiffartuussinissamik isumaqatigiissutit aqqutigalugit pisortanit tapiiffigineqarsimapput, taamaammallu nalinginnaasumik niuernikkut atugassarititat nalinginnaasut tunngavigalugit ingerlanneqarsimasutut oqaatigineqarsinnaanatik. Tassani assersuutitut taaneqarsinnaavoq Arctic Greenfoodip (AGF) nunaqarfinni tunisassioffi. Taamaakkaluartoq AGF-ip kaaviiartitai ukiuni kingullerni marlunni amerleriarsimapput. Isumaqarpunga tamanna ingerlatsilluarnikkut niuerluarnikkullu anguneqarsimassasoq, kisiannili nunaqarfinni tunisassioffiit ataasiakkaat ingerlatsinikkut aningaasartuuteqarnermikkut annertuumik ajornartorsiuteqarput. AGF-ip kissaatigaa ingerlatseqatigiiffik 2014-imiit kiffartuussinermik isumaqatigiissut atornagu ingerlanneqalersinnaajumaartoq.

Naalakkersuisunut apeqquut 8

Atassut isumaqarpoq tunitsivinnik aamma/imaluunniit nioqutissioffinnik nunaqarfinniittunik tigusinissamut taarsigassarsisinnaanissamut namminersorlutik ingerlassiniartut landskassemik qularnasveequsiiffigineqarsinnaasariaqartut. Naalakkersuisut isumaqarpat aningaasalersueriaaseq taamaattoq atorineqarsinnaasoq aammalu siulinnerusukkut tamanna misilinneqarsimanerpa?

Apeqquut 8-mut akissut

Namminersortunut tunitsivinnik tiguserusuttunut Nunatta Karsianit qularnaveequsiinissaq eqqarsaatigalugu nalunaarutigissavara massakut Naalakkersuisuusut aqqissuussinermik taamatut isikkoqartumik atuisoqalernissaanik eqqarsaateqanngimmata. Tamatumunnga siullertut pissutaavoq tunitsivinnut kiffartuussinissamik isumaqatigiissutit aqqutigalugit tapiissuteqartarnerit atorunnaarsivinneqarnissaat Naalakkersuisunit sulissutigineqarmat. Taamaammat tunitsiviit niuernikkut atugassarititaasut malillugit ingerlanneqarsinnaanngitsut pisortanit tapiiffigineqarnissartik ilimagissanngilaat. Naalakkersuisut inuiaqatigiinni suliassaqarfinni allani ineriartortitsinissamik pisariaqartitsiffiusuni suliffeqarfinnik imminnut akilersinnaanngitsunik atatitsiinnarnissartik kissaatiginngilaat.

Inussiarnersumik inuulluaqqusillunga

Ane Hansen